

光緒山西通志

金石記九

記五之九

山西通志第九

卷九

石室山在太原縣西

晉書

原

柱

石題

造像

法帖

磚瓦

古刻

西山石室篆書

舊在太原縣西

寰宇記石室山俊魏與國土地記云太原有石室方丈有

四尺四壁有篆字人莫之識

箕山石室篆書

舊在遼州

寰宇記遼州遼山縣箕山在縣西四十五里後魏風土記

山有石室方四丈屋中文字篆書人莫能識

謹案此二則樂史並引後魏地志明是北朝以前古刻而方乘已不能確指所在詢之土人亦無知者蓋古蹟之沈湮久矣

後魏

石佛嶺摩崖記

禾平中 今在鳳臺縣浩村

鳳臺縣志浩村有石佛嶺雕佛像數十摩崖爲記字多剝落其文有日月麗天江河帶地魏帝禾平鄉飲瀆風等八十餘字禾平宣武帝九年所改元也

北齊

崖缺燈石經

舊在遼州

寰宇記遼山縣屋隸嶺郡國志云高齊之初鑄山腹寫一切釋經于此

謹案屋隸嶺今不詳所在考武鄉縣東七十里有屋隸峯道通遼州志云石壁千仞僅通行人鐙當是嶺之譌文靈嶺之稱或卽以寫經爲義其地距遼州四十五里安得好事者攀藤剔蘚一搜其奇乎

唐

砥柱銘

貞觀十二年 魏徵撰薛純書舊在平陸縣三門山

廣川書跋唐砥柱銘其字因山鑿鑿就其窪平隨多少置故不成行序宛轉索於嶺巘間以摹故石雖存而頗難得

世知貴之唐以書學相高刻石之文此其最大者也筆力有餘點畫不失尙多隸體氣象奇偉猶有古人體法其後柳公權書刻招提今已譌缺不可讀惟純所書在渭河間得完善蓋摹襲之工不至故耳 又辨法師碑跋薛純陀書昔歐陽公嘗評其不減率更然所書不傳永叔所得惟此純陀貞觀十二年奉勅書銘砥柱其字磊落如山石自開隱鱗而出可以見方丈之勢固無牽強以成當時如虞伯施褚登善號能書者皆避而讓之其後柳誠懇愛其書恐失其次第則又別書於石後世得純陀所書砥柱銘者皆碎雜叢疊必按此序之砥柱銘爲薛純而此碑爲薛純陀嘗爲祕書正字本名純陀後以純自列於時余於類書見之

志略焯按薛純書歐陽公趙明誠皆極力推許至董氏謂  
虞褚諸人當時皆避而讓之可想見其奇偉矣然砥柱銘  
歐趙已不著錄今晉人竟無知者竊以瘞鶴銘爲六朝人  
書藏江水中至今猶存此銘在濁河間南宋時猶得榻本  
豈至今遂沈湮哉蓋砥柱有三門之險驚濤駭浪阻隘峯  
崎旣爲士君子之所不到而篙師舟子雖日過而若無睹  
所以不傳也然神物顯晦有時其藏於幽巖遠壑之厯數  
百年而不顯於世者正天之愛之而陰爲呵護也何時親  
歷其境駕舟中流手搦以歸爲斯銘一發其奇豈非宇宙  
中一大快事哉

馬壁峪摩崖佛經

顯慶五年 今在鄉甯縣南七十五里

鄉甯縣志峪有觀音堂在陡壁下摩崖碑字畫端楷刻  
觀音經明隆慶二年也

謹案石刻心經後署顯慶字甚明煉志誤

### 澤州碧落碑

永淳二年 舊在鳳臺縣西北十五里石佛谷碧落寺

五總志唐韓王元嘉澤絳二州皆有子黃公讓爲妣妃薦  
祀作文立石以表孝誠文雖不同而俱名碧落在絳州者  
刻於天尊之背在澤州者立於佛龕之西

半塘間筆今碧落寺有金明昌五年澤州刺史許安仁碑  
云唐韓王元嘉三子黃公李讓爲母妃房祈福石刻彌勒  
像摩崖篆碑後刺絳州又刻天尊像篆碑文異而篆同皆  
誤一筆書也案此誤絳州刻在總章宋劉義叟仲更恨未

通識會修唐書摛楷本之局因朱子京始能盡通貽澤守  
宋選從子敏求隸書刻石州廡歐公集古錄及弇州跋皆  
未悉此故於絳州別石互有指名今澤州碑已燬

鳳臺縣志摩崖碑有宋敏求書所作釋文府志云舊在  
郡署今已片石無存

謹案許安仁刺澤時摩崖原刻及宋敏求釋文皆所  
親覩定爲黃公譔書必有確據可以息絳州碑諸家  
之訟獨是歐陽公與宋子京同在史局宋見墨本且  
爲通釋而集古錄收絳碑竟不言澤州刻何耶又趙  
明誠金石錄有承道二年司馬山彌勒像碑注爲篆  
書似會見拓本者而不知爲卽碧落碑皆不可曉  
後今絳碑以有州將摹刻流傳不絕而澤之摩崖以

辨詳



閩在山谷世魁知者一燬之後遂無隻字得見於世  
惜哉

彌勒寺石壁記

周萬歲通天二年 今在澤州府碧落寺

鳳臺縣志記前列萬歲通天二年八月 缺 秋日壬申佛

弟子 缺 慶 缺 以來不宜自養宜乞佛家令養送 缺

十歲考萬歲通天祇一年記云二年者后以延獻元年

九月改元至明年三月復改元神功合爲二年至八月

秋日尙稱通天與史兩歧其中天地年月日時數目等

字皆從后所制 案山石碑目有焦知慶供佛記當卽此碑姓名無缺

又記

神龍二年

鳳臺縣志記脫落數字前列雜大字缺三二年歲次景午

二月朔十八日釋元素字缺三男阿難妻缺男山僧等比

問良師與父母宜所眷念乞石像始得長壽山僧等前身薄福今日以後望得長命更莫遣鬼神相侵長卽仰金剛密護持山僧令使長命保元年百歲文義似爲子祈壽語考唐中宗神龍二年景午字形不似隋開皇六年景午年又不符惟北史魏孝昌二年景午與記合又考北魏成帝和平初僧曇暉請鑿壁爲窟雕刻佛像五處一時郡縣效尤此則彌勒像自北魏已有之不始於韓王元嘉或者元嘉重加修葺摩崖爲碑歟

謹案唐以高祖父代祖元皇帝諱曷故碑版皆書丙爲景北史修於唐人紀年亦皆以景代丙縣志據史

以此景午屬北魏孝昌殊謬當拓跋時安知有唐之諱而預避之也

又記

無年月

半塘開筆壁有篆刻七字隸書五言古四言讀後云鄉貢進士中補奉父詹命而作其姓氏年代莫考

抱腹寺摩崖碑銘

開元二十年 今在介休縣絳山

介休縣志碑在抱腹巖舊志云貞觀中建雲臺寺於大巖以碑文證之因唐會改大雲寺而誤巖外崖奇險狹而進觀者股慄沙堡曹子勤祇甫弱不勝衣家世重金石縱而下裏三日糧竟出拓本以示人汲古之勤如此

亦豈易及哉

謹案碑署朝議郎行汾州孝義

缺

上柱國高都郡開

國公宏農楊仲昌夔撰朝請郎守晉州霍邑縣令范

陽張晉

缺

伯暉書額題大唐汾州抱腹寺碑篆法圓

整其分隸結體亦有漢碑遺意當均爲伯暉所書惜

名泐其一字也仲昌有魏文侯墓碑已著錄此碑銘

序並極雅飭題銜下名字兼署唐碑時有以一字表

名則碑罕見矣仲昌夔父元揆公爵又以監察御史

出宰故云行縣若兼官也碑左側有宋元祐九年皇

甫韶題名並所作五樓寺詩又有金貞祐三年耶中

李策題名右側刻賀監詩前書醉後逢汾州人寄馬

使君題抱腹寺

缺

四明狂客賀季真正癩發時作末

署庚辰歲首十二日故人太子賓客賀知章敬呈詩  
昔年與親友俱登抱腹山數重攀雲梯  
一別廿餘載此情思彌添不言生  
八十餘數年髮絲心尚殷附此一  
六句下有自注云將與故人蘇三  
正布口口口口口口口口口口口  
煩人力直上至今不忘忽逢彼州  
馬使君請送至庚辰爲開元二十八  
寺題壁上幸也  
客來遊在開元六七年間錄之可爲山中增一韻事  
特不知馬使君何名耳此詩上方有大書岳  
泚秀廿六年九字不解所謂其左側下方又有彥齡  
連年游抱腹皆自雲梯歸字資甫云彥齡王姓見詞  
苑叢談

琵琶泓石壁詩刻

天寶五年 今在鳳臺縣東南十五里

八紙縣志清風壁詩序石刻在琵琶洲朝議大夫高平  
郡別駕權滋詞錢塘縣尉瑯琊王紆書天寶五載夏五  
月二十日從末行逆讀白序其秉憲被譴來佐丹曲訪  
茲勝遊詩字俱佳權徽名新舊唐書俱不載權氏宰相  
世系表及姓族諸書並無其人或非天水一族也郡人  
王紆想以瑯琊地望而係之

七古見  
縣志

韋韋滋一名聖字法詩序  
云木中聖字了了可見詩

### 崇徽公主手痕碑

大歷四年 今在靈石縣南關鎮汾河側

集古錄崇徽公主手痕碑李山甫撰崇徽公主者僕固懷  
恩女也懷恩在肅宗時先以二女嫁回紇其一嫁毗伽可  
汗少子後號登里可汗者也一不知所嫁何人唐書懷恩

傳及回紇傳皆不載惟懷恩所上書自陳六罪有二女遣  
嫁爲國和親以此知其又當嫁一女耳此所謂崇徽公主  
懷恩幼女也懷恩既反引羌渾奴刺爲邊患永泰中病死  
於靈武其從子名臣以千騎降唐始以懷恩幼女爲崇徽  
公主又嫁回紇卽此也

靈石縣志在陰地關唐大曆四年以崇徽公主出塞道  
出汾州以石拓壁遂有手痕舊有碑今漫滅獨其手痕  
至今宛然李山甫詩云

謹案靈石縣唐貞觀後至宋並屬汾州故樂古錄及  
通志金石略皆謂碑在汾州也陰地關在縣南五十  
里今名南關鎮蓋沿宋時陽諒南關之名也

石佛崖心經

承貞中 今在吉州寬解河村北崖上見舊通志

韓文公老君堂後崖題名

長慶二年 今在平定州娘子關

志略承天寨老君堂後崖石上刻韓愈吳丹過此七字乃使鎮州宣慰王庭漢時題名也寨爲張奉璋所築志云裴

晉公征河朔駐兵於此又云晉公與昌黎題名石壁殊無

確證衆韓集有夕次壽陽驛題吳郎中詩後詩爲使鎮州確證時作吳郎中即吳丹也晉公題名或別是一石俟考

案承天軍地胡三省通鑑注廣陽漢上艾縣井陘關在其

東葦澤關在其東北皆通山東之路葦澤關卽娘子關也

自唐於此築承天軍遂爲歷代行師要衝其路當桃水而

下由州境西北達於壽陽今大路自井陘故關入則道州

城在承天軍南別見補遺



河東節度使王宰摩崖碑

大中三年三月 今在靈石縣照碑灘

靈石縣志照碑灘在夏門西數里汾水之南石壁峭立有唐節度使王宰碑其北有通濟橋蘭陵蕭拱碑兩碑相照皆摩崖書水落乃可搨取以地在幽僻是以世無知者近日始爲邑宰王志融搜尋古蹟得之

謹案碑爲宰留守北都久覲歸鎮時所留題文序所歷官階自開成五年出隴州防禦拜工部尙書節制邠甯始其云會昌三年九月自許昌統當軍騎帥洎河陽義成宣武浙西宣歙等軍兵馬充攻討使誅壺關逆賊指討劉稹之叛也與唐書武宗本紀三年九月辛卯以忠武軍節度王宰兼河陽行營攻討使合

其云大中元年奏以靈蔚朔三州之腹爲賊狹要政其利宜請立耕戰三城募卒六千任其事與宣宗本紀元年四月吐蕃回鶻寇河西河東節度使王宰伐之台唐書王宰附父智與傳名晏宰後去晏字碑敘所歷官最詳末云駐旆關亭吟睇移景又觀中令河東公及相國令狐公左授狄公相國崔公來罷之題列當爲狄梁公裴晉公及令狐父子皆嘗鎮河東者崔相疑爲崔圓曾守汾州者也據通濟橋碑言其地有雁歸亭中朝名士息駕未嘗不題藻句紀年代然則當時諸公並有留題今無復存者矣

高壁鎮通濟橋摩崖記

咸通十三年四月 蕭珙撰今在靈石縣照壁灘

梁中靖再訪古碑記由夏門西行六七里日照壁灘兩  
碑相照故名山勢峙立汾水中流幽谷邃袤長四十里  
其南卽陰地關蓋古之雀鼠谷也碑在河北者唐咸通  
十三年蕭珙通濟橋記記有高壁鎮雁歸亭諸勝書法  
蒼老距水高數尋在河南者唐大中三年節度使王宰  
記自敘其升遷之故與往來之由楷書道勁入河深尺  
又其上有小碑字剝落不可辨蓋古驛通衢遊人多題  
詠焉乾隆丁未文與喬君訪於牧豎而碑始顯偕同人  
往搗之今年秋天日清爽水落沙見同游復有訪碑之  
約於是出古峪灘循水而南水流石崖下匍伏行數武  
迺緣石磴而登荒徑逼仄狹不容步危臨絕澗激浪怒  
號心搖目眩惴惴不敢下視約數里始至至則覽雄鎮

尋古勝碑猶對峙而寒山寂寞野草蒼茫求所謂高壁  
鎮雁歸亭者渺然不可得噫大中至今九百六十年矣  
而碑之顯喬君以前無聞焉豈古人勝迹有所待而後  
見耶抑石之顯晦自有時耶丁未至今二十五年矣而  
古碑殘缺又不如昔則後此者可知也亦安知不有好  
事如吾儕者復從而訪之耶

北魏古佛龕摩崖記

天復元年 今在鳳臺縣硤石山

鳳臺縣志在青蓮寺後偏乳竇處記稱此古佛一龕先  
無年號

缺

藏禪師

字

記云武定元年歲次癸亥修畢

至唐天復元年十二月十七日因鑄新像重書古記考  
武定癸亥東魏建元而天復元年則昭宗辛酉後一年

復改天佑

碭石山楊夫人摩崖詩刻

天佑十一年 今在鳳臺縣

鳳臺縣志石壁刻唐天佑丙子歲六月十四日離府至中甸巡祀到此登陟碭石山偶上先師擲筆臺眺觀景象爲詩上碭宏農郡君夫人述按天佑丙子晉稱天佑十一年是年李嗣昭立鐘開元寺以七月十三日宏農郡君夫人遊碭石山則六月十四日考唐制有郡君夫人公侯伯子夫人制同一二三四品似屬嗣昭夫人楊氏但嗣昭封隴西郡公未封宏農或因宏農華陰以楊氏族望爲稱也又考楊氏善蓄財嗣昭被梁兵圍夾城彌年楊氏多助其軍用子繼韜叛後入京楊齋銀數十

萬以賂釋其罪後與子繼忠家晉陽餘貨猶鉅萬首高祖起義貸其殖以賂契丹後以繼忠爲刺史楊氏平生積產嗣昭三世皆賴今復見其石刻筆蹟直奇婦人也

案石刻詩云此山爲通靈煙壁巖巖勢分嶺丹水流而曲如帶風聲羅鼓聽管絃爲啼花開入禪意巖筆臺前尤明直筆想當年無

連合紛紛散落雨花天

石佛嶺摩崖後記

天祐十九年二月 今在鳳臺縣浩村

鳳臺縣志記中多載梵語考十九年爲癸未記銷於二月至四月莊宗稱皇帝改元爲同光

五代晉

白雲洞摩崖佛經

天福五年 今在絳縣東二十里

絳縣志白雲洞在縣東太行山洞深二丈餘外就崖磨  
碑刻佛經一卷末注晉天符五年白雲子書按晉無天  
符年號疑爲天福

宋

桑子鋪石壁詩刻

天聖九年 今在隰州

隰州志石壁刻詩云峨峨煥畔石迢迢石逸路寄言名  
利徒清風誠足慕天聖九年八月二十五日河東轉運  
使兵部尙書郎中直史館孫冲題長孫郊社齋郎京書  
次孫校書郎承捧硯金城趙君同至此按冲字升伯承  
字曼叔宋史有傳祖孫皆有聲於時道旁石刻閱七百  
年完好如故亦隰之勝蹟也

志雲院摩崖碑銘

景祐五年 今在壺關縣紫團山

壺關縣志碑文駢麗前題新修潞州壺關縣紫團鄉志

雲院碑銘朝奉郎太常博士直史館權知潞州軍事柱

國賜缺魚袋董道撰并篆額後有布衣施懷寶書匠王

耶鏞字一行又題名一行有高成沈希周來元後一行

紀年書缺祐五年仲夏十六日記祐上一字缺案宋仁

宗改元有景祐皇佑嘉佑哲宗建元爲元祐皆有五年

雖景祐僅四年然至次年十一月始改寶元碑刻於仲

夏則亦可稱五年莫能定爲何時惟至政和申已稱爲

古碑其刻於仁宗初又無可疑案碑文稱院主信崇上

越太平興國七年冬十月勅賜慈雲院額名上人以其

早契宿因迴向佛法見說論選敢無愧辭則文當成於



太宗時不應踰五十年始摹刻也似景祐字亦不甚確  
或是消化五年宇泐後僅存人之偏旁寫者疑爲佑字  
耳碑爲紫圍三十六景之一朱王輔道有詩舊志所云  
摩崖古蹟者乃碑額所篆新慈雲院碑文六字愁？矣  
碑皆古文惟書新作篆文作茂則故作怪異以欺人矣  
天橋峽口石刻

治平元年 今在保德州東北三十里

保德州志峽石上有字云治平元年甲辰冬十一月望

下張缺 巡河至此云云餘皆剝落水長石沒則字不見

案志又云驚濤石字在天橋黃河石峽中魚多匯聚人  
因漁之浪中石刻字云食我不肥賣我不富數歲時  
字跡宛然歲久不磨  
傍有年號疑治平字

峽石山題名記

元豐八年 今在鳳臺縣

鳳臺縣志石刻朝議大夫晏知止處善通判魯康伯甫  
夫穎州僉判許公甫晉城縣令銜規頴州司法參軍李  
新同遊峽石山福巖禪院登遠師擲筆盡望瑤山悠然  
有塵外志因南縱百餘步訪青蓮院求師遊跡於殿庭  
之下臨丹川快襟久之元豐八年歲次乙丑夏五月癸  
巳朔二十六日戊午銜規題考五龍廟碑徽宗大觀三  
年戊辰銜規稱知軍州管司學事先於神宗元豐八年  
稱晉城令二十二年之久始行遷轉何其難也又考知  
止宰相殊子史止言官朝議大夫不言其知澤州今從  
題名考入以證宋史之闕

琵琶浚石壁詩刻

紹聖二年 今在鳳臺縣

鳳臺縣志石壁詩一首序云余至濩澤俟代者因遊是  
院探龍穴觀琵琶絃抵暮乃還遂留詩於石壁郡倅崔  
順孫毅夫俱行紹聖三年三月十四日提點刑獄洛陽  
楊謨題詩七古一首後列朝奉郎下缺崔順孫上石晉城縣  
令張異摹勒考紹聖三年哲宗丙子所稱提點刑獄按  
宋制諸路提刑掌察所部獄訟訊囚覆案牘凡有留獄  
逋盜皆劾以聞及舉劾官吏請事紹聖初提刑兼管坑  
冶楊謨之名宋史失載又據紹聖碑刻郡守王元與崔  
順孫等兩遊此地闕文或係郡守王元也

正  
堂溝石像記

大定四年 今在鳳臺縣

鳳臺縣志金摩崖碑記在佛堂溝內有石佛條記書大定四年月日鑄相傳廟遭回祿後人重刻之或云卽唐陳子昂題詩處不知子昂題句在碧落寺非此地也

擲筆臺題名記

大定六年 今在鳳臺縣

鳳臺縣志記從後逆書唐人題壁多此類大定戊戌閏六月十二日蓮峯眞逸喬辰仲章由山陽歸天黨因遊青蓮精舍安霖巖起張瑾孔璋搗秋泉如林下約雅集釋道安寂然竹軒翼日乃還期而不至者清溪道人孫昶明遠也主僧寶鈿刻石考大定戊戌世宗六年題名諸人喬辰初名遂辰金詩小傳字君章石刻仲章非君章所謂蓮峯眞逸則詩傳所同也其安霖張瑾孫昶三

人不見於金史卽屢亦金史無名或者金制取士過多  
三人皆其同年友歟又金時文人多以四字爲別號亦  
一時之陋習也

案題名安霖號秀寂號  
人張璵號錦溪隱隱

又記

大定十九年

鳳臺縣志擲筆臺名記皆自後逆書建州張翥雲翔端  
城王士

缺

子仁古韓鄭賓子谷仝遊青蓮訪寂無二上

人流覽勝概經宿而歸大定己亥秋十二日題考元張  
翥本傳字仲舉此云字雲翔應另爲一人又明初澤屬  
陽城亦有張翥官司訓蓋姓名之偶同者也

元

天橋峽河崖石刻

至元十二年 今在保德州

保德州志河西巖有峻壁書云皇子安王府掾史僕散

翰之與怯薛丹官人和者同奉上命特遣水運大木前

至長安上自積石州東有一地名打羅缺下徹天橋子

訪缺此二河水石險惡自古以來未嘗敢行所以備率

諸官集缺拜祭缺乘駕於此皆賴天神所護我國家洪

福之所致也故誓於此以示後歲在乙亥至元十二年

六月八日題

謹案元史世祖次子莽噶拉木封安西王志云安王

寫者誤脫西字也本傳至元十年益封秦王此碑仍

稱舊封者史言其府在長安者爲安西在六盤者爲

開成皆聽爲宮邸然則運木至長安直以營建府邸

耳耳作怱哥刺木原

李太白壯觀字摩崖刻

一在渾源州破落峽一在交城縣石壁山

渾源州志磁窰峽在州南五十里東巖上有唐李太白壯觀二字筆力遒勁人多摹塌 交城縣志李太白壯觀二字鐫石壁山千佛閣後石礎上

諸案二志均不詳何時摹刻據渾源志則明以前已有之矣

玉蓮洞摩崖碑

今在鄉甯縣南雲邱山

鄉甯縣志雲邱山上有玉蓮洞其巖崖也山頂卽三天門懸崖數十丈石髓滴成倒垂蓮瓣上有摩崖碑漫漶

不可識其下元碑尙存

果老洞石壁石刻

今在平定州東七十里

平定州志洞爽而遙多唐宋人題詠今剝落

飲龍泉摩崖詩刻

今在平定州西南豬頭山

平定州志山崖勒七言長句字大可四寸許風雨磨滅  
失其名氏

西山摩崖篆書

今在太原縣西風谷山

太原縣志巖石上鏡字云立一箭臥一箭金鍋斗子露  
一半溝之南道之北一輛金車露枝輻不知何代所刻



右摩崖

後魏

甯先宮石柱題字

舊在大同府

水經注如渾水又逕甯先宮東宮之東次下有兩石柱是石虎鄴城東門橋石柱也按柱勒趙建武中造以其石作工妙徙之於此余爲尙書祠部與宜都王穆羅同拜北郊親所經見柱側悉鏤雲矩上作蟠螭信爲工巧去子丹碑則遠矣

北齊

廣福寺石幢

天保元年 今在鳳臺縣周村

鳳臺縣志石分八面前書大威德經施主姓名字多漫滅前後俱有大齊天保元年末行書月日壬申立石考天保元年齊文宣庚午疑寺爲此時所建也

風峪華嚴經石柱

天保二年 今在太原縣

曝書亭集風峪石刻佛經記太原縣之西五里有山曰風峪風穴存焉相傳神至則穴中肅然有聲風之所從出也愚者搥土塞穴建石佛於內環列所刻佛經凡石柱一百二十有六積歲既久虺蝮居之雖好游者勿敢入焉丙午三月予率土人燎薪以入審視書法非近代所及惜皆掩其三面未縱觀其全也北朝君臣崇奉釋氏石刻經像在處多有子友太原傅山行平定山中誤墜崖谷見洞口石

經林列與風峪等皆北齊天寶間字而房山石經刻之自隋甚矣其法之蕃熾也又蒙山古碣跋通鑑載後唐劉后與李存渥奔晉陽李彥超不納存渥走至風谷爲其下所殺胡三省注風谷當作嵐谷唐長安三年分宜芳縣置嵐谷縣屬嵐州非也風谷卽風峪北人讀谷爲峪俗並加山作峪

金石文字記案北齊書段詔傳突厥從北結陣而前東距汾河西被風谷大唐創業起居注煬帝於樓煩置宮因過太原取龍山風谷道行幸則風谷之名已著於前代矣金石萃編按風峪今俗稱風洞洞中有石刻華嚴經金石諸書多未見著錄卽曝書亭集有風峪石刻佛經記亦但云環列所刻佛經而已不言爲華嚴經也記言石柱一百

二十有六不知山西通志何以但云三柱也以應慶之洞  
方五丈必非三柱所能擋則通志所指三柱或別是虛立  
之柱耳柱有百二十六必是周立於洞中經卽刻於柱上  
柱有四面必皆刻經竹垞所見已云掩其三面則今所搨  
者亦祇一面耳今搨大小共一百二十四紙顯係一柱一  
紙與其柱數不符者僅少其二也全經有八十一卷今搨  
本首行有卷第標目者計三十八紙餘俱無考想皆散見  
於三面而不能搨矣案今所見拓本長短廣狹不一王氏  
三行行五十七字者舉其最大者言之耳其書非一人作  
每行字數亦不齊一間有界方格者不多見也王氏所得  
百二十四紙有標目者三十八今拓只四十六紙內十二  
紙有標目而已或石有散亡或工人未及全拓皆不可知  
也碑無時代年月及刻經記序題名惟卷冊七之末行題  
云佛弟子許智通妻宋十娘許五娘女許三娘姓名可見

者祇此金石文字記列於天保二年當自有據然別無詳說可證其標題亦但作石刻佛經則亦未嘗詳閱此碑也  
案題名紙今存曹子勤云會見一紙有天保元年字大要全徑八十一卷每卷有頭五六紙始盡者故標目皆齊某卷之上下某卷之四五其刻工必非一年內能竣事者天保爲齊文宣帝紀年曝書亭集刻作天寶誤也經文書格不一有秀整者有流動者大致類初唐虞褚其中有四十作卅星作○天作丌則北朝間有之以此爲天保書無足疑者  
標題華嚴多作花此碑推拓不易刻在西安時適同年沈君業富官山西鹽運使因託其購覓拓寄此本雖闕佚尙多究爲北齊之物亦可珍也

禪慧寺千佛石幢

天保十年 今在介休縣史村

介休新志寺久圯殘石委榛莽中則北齊千像石幢也  
文云天保十年七月十五日比丘法悅邑子等一千人  
願造千像成就起大齋主王韶儁千像主王湧其兄弟  
爲上父王天賜上母宋法花字祈福願願從心一時  
成佛按幢高四尺六寸博厚各一尺三寸中方八寸文  
七行行六十四字餘石分九層刻佛像千像旁各鐫姓  
名惟史宋張三姓有可辨識者其云大齋主千像主猶  
今之稱施主七月十五日佛家爲盂蘭會邑子等爲王  
氏父母造幢祈福天賜法花則韶儁父母之名上父上  
母之云諛辭也介邑牌板此爲最古汾陽相國寺北齊  
碑已爲亭林竹垞所蒐採而此獨沈淪顯晦亦自有時

哉

隋

東淑村造像石幢

開皇五年

鳳臺縣志隋石佛記碑分四面三面列字一面刻佛像

如魏齊製細注施主姓名於邊後序文多不可辨後書

清信士趙

缺入

仰爲皇帝敬造龍幢

缺六

四年俱入

字缺六開皇五年月日文義蓋爲文帝祈禱而作

唐

乾明寺經幢

永昌元年 今在鳳臺縣可寒山

鳳臺縣志篆書尊勝陀羅尼之經幢八大字下書唐儀

鳳元年月日建立字多漫滅不可曉

三清殿經幢

永昌元年 今在澤州府城

鳳臺縣志在三清殿外第一行書尊勝陀羅尼經幢並

序字有顏歐意序亦甚古惜缺其下半後有志靜

缺二字

法師詒受神缺法師等字序不具載師蓋佛陀波利也

而前列儀鳳則高宗改元也後書主僧敬鄰都頭李邛

副邑缺秦延祚并書考唐武職有都頭散都頭等名其

捧日都頭李晟等曾爲之

湯王廟經幢

永昌元年 今在鳳臺縣甘澗村

鳳臺縣志幢斷而爲三字多可辨前書尊勝陀羅尼經

幢并飾錄扇寶門佛陀波利取經譯始末後書永昌



元年八月日考永昌武后已丑后所造天地日月十二  
字在高宗儀鳳時府城石幢已遵制書寫何至偽周改  
元反守古體或者武氏敬禮佛法釋典未敢更易歟

謹案縣志所載儀鳳永昌三幢皆不甚確蓋誤據經  
序年月爲造幢年月也考佛頂尊勝陀羅尼經有二  
譯各一卷一爲朝散郎杜行顛譯者無序一爲罽賓  
沙門佛陀波利所譯有永昌元年八月定覺寺沙門  
志靜序略云婆羅門僧佛陀波利儀鳳元年從西國  
來到五臺山求見文殊師利見一老人謂僧曰漢地  
眾生多造罪業出家之輩亦多犯戒律唯有佛頂尊  
勝陀羅尼經能滅諸惡業師可卻回西國取此經來  
流傳漢土僧回還西國取經至永淳二年回至西京

具以上事聞奏帝將其本入內請日照三藏法師及  
勅司賓寺典客杜行顛等共譯此經勅施僧絹三十  
匹其經本禁在內不出其僧悲泣請還流行帝遂留  
翻得之經還僧梵本將向西明寺訪得解善梵語漢  
僧貞順奏共翻譯今前後翻兩本並流行於世小小  
語有不同至垂拱三年延覺寺主僧志靜在魏國東  
寺親見日照三藏法師誦受神呪法師於是口宣梵  
音經二句日句句委授是足梵音一無差失仍更取  
舊翻梵本勘校所有脫錯悉皆改定其呪初注云最  
後別翻者是也其呪句稍異於杜令所翻者其新呪  
改定不錯至永昌元年八月於大敬愛寺見西明寺  
上座澄法師及翻經僧順貞見在西明寺此經救拔

幽顯最不可思議云云據此則經頒行於武后時其儀鳳元年爲佛陀波利初來之日永昌元年爲經文校定之時安得澤州已先造幢刊經惟據志則府城一幢有武后新製字或是永昌中所造其乾明寺所書儀鳳元年建立字或係建寺之年或仍爲志誤皆不可考姑並列之武周而正其誤於後

### 崇福寺經幢

神功元年 今在壽陽縣平舒村

壽陽縣志幢高丈餘八角三層上層蓮花頂已圯中層鐫陀羅尼經額周圍鐫十六大字日上爲皇帝陛下敬造佛頂尊勝陀羅尼幢馬首農言云其時武后臨朝所云皇帝陛下蓋謂武后上則謂中宗也然神功年號猶

係大唐不書周代當日人心可知矣

謹案上爲皇帝本造像常語自北朝已然僞周革命至是八年矣當時碑版紀年亦或不書大周字然未有仍係以唐者果有之真大義事亦大奇事也

相里村經幢

景龍三年 今在汾陽縣大相里路旁

吉祥寺經幢

開元二十七年 今在介休縣兩水村

介休新志古吉祥寺有佛頂尊勝陀羅尼經幢末書開元二十七年知爲唐代所建幢八面各寬八寸高五尺施者名已漫滅完好者僅五百餘字正書筆勢遒勁絕類率更唐幢之見於金石著錄者此爲最佳文苦作苦

隸作疑佛作仏幢作幢畢秋颿云幢當作幢從心者古  
人假借耳

晉陽鄉經幢

天寶元年 今在鳳臺縣東四義村清震觀

鳳臺縣志幢書佛頂尊勝陀羅尼經并序後書天寶元  
年歲次壬午九月癸卯朔九日辛亥高平郡晉城縣晉  
陽鄉四缺東村小邑眾造此經幢據天寶元年稱高平  
郡晉城縣與唐書合府志作二年誤

甘露巷經幢

天寶元年 今在平遙縣侯冀村

平遙縣志藏經塔在甘露巷東南浮圖數級內有經幢  
上刻佛頂尊勝陀羅尼經全部字體似歐而有虞意唐

天寶元年里人馬國敬題

謹案是幢於經中呪並刺釋音末七行上有爲國敬造四篆字末書天寶元年歲次壬午九月癸卯四日景午建無書人姓名縣志所云或別一幢也

開元寺經幢

天寶十二年 今在澤州府

鳳臺縣志幢節錄尊勝陀羅尼經其可辨者二百餘字起處缺二字下云楊缺仙奉神武應道皇帝建立寶幢

皇帝廣缺善貸天寶七載五月十三日大赦天下竹慶

維新上報聖意缺待制後書大唐天寶十有二載歲

次癸巳七月壬子十五日甲寅立石書法絕似聖教序考天寶七年五月大赦與唐書同而是年羣臣上徽號

爲開元天寶聖神文武應道皇帝幢祇云神武蓋幢之略也

崇壽寺二經幢

天寶中 今在鳳臺縣

鳳臺縣志石幢二書佛頂尊經皆開元天寶聖神文武應道皇帝比開元寺石幢致爲詳明

王守忠經幢

永泰元年 今在聞喜縣上東鎮

聞喜縣志石幢高尺有六寸六面每面四寸書尊勝陀羅尼經永泰元年十二月缺五聞喜縣令王守忠敬造

守忠之名世系表有之乃太原大房王氏大觀之孫同人之子願表不云曾爲聞喜令也千餘年後姓名職官

反附荒唄以傳王君固有美政歟抑大雄氏之法力歟  
又案唐臨晉縣太原鄉牒文稱太原王氏居河東其鄉  
名太原鄉此鄉於永泰元年因人戶破散併省入解城  
鄉意守忠見宗族離徙爲是建幢徼福乎年月不爽庶  
近之

計山二經幢

貞元元和中 今在交城縣

朱彝尊游卦山記丙午之秋予與同里包銘登是山觀  
唐支高李元穆所撰碑記及貞元元和中陀羅尼石幢  
青蓮寺經幢

開成二年 今在鳳臺縣

鳳臺縣志前書佛頂尊勝陀羅尼經幢并讚序鄉士趙



洞徹撰書文用駢體辭頗工雅後書唐開成四年己巳五月十日建立考開成爲文宗年號元年丙辰四年己未二年係丁巳非己巳其爲幢誤無疑

寶林寺經幢

天復三年 今在鳳臺縣廣福寺

鳳臺縣志幢刻金剛波羅蜜經字尙明晰後書功德主李宗爲屢遭亂離骨肉團聚敬獻釋迦如來佛像及諸天像於寶林寺並建經幢仰報慈庥唐天復三年月日據此則寺舊名寶林廣福乃金所勅賜也考天復三年昭宗癸亥梁晉交爭澤潞金戈鐵馬隨地皆爲戰場民於此日不聊生乃有餘暇復經營佛事豈果佛力之所

護耶

聖臨菴造像幢

今在鳳臺縣四義村

鳳臺縣志幢斷爲二年代剝落上鐫諸佛像甚古列施

主佛弟子男婦姓名有上柱國西經略軍

下羽林飛騎

缺考羽林軍漢武帝置羽林至唐貞觀間置左

右屯營其名飛騎別有驍騎等尉又考唐因隋制有上

柱國街貞觀二年送州置經略使至宋祇傳經略三人

不常置且無飛騎名其爲唐幢無疑

繁峙殘幢

今在縣城關帝廟

繁峙縣志幢八面刻尊勝陀羅尼經上截字多漫滅經

呪之前有序歷述取經譯經始末及持奉徵應有儀鳳

垂拱永昌紀元字可辨經文後四行則刻石姓名也有

見在功德主步軍將判官呂缺訓妻趙氏男元龍缺五

女十一娘十二娘十三娘在家一娘子于鞏張士宏權

馬軍判官孟從李師張興劉元審外缺趙進忠缺五女

五娘子施鏡子一面權缺判官張于審施塤五十缺願

堪曹家岭施鈴子二隻前勾判官程叔文缺押衙李敬

文妻米氏凡三行末一行有蔣夫人及父老康叔文趙

公謹僧浮休十餘字可識案唐左右神策軍有步軍將

軍馬軍將軍其屬有判官三人都勾判官一人他衙軍

所無也其勾押衙諸職亦惟唐時有之幢制作渾古

字嚴具規模不知何寺中物後來移置於此

郭存實經幢

天佑十八年 今在鳳臺縣青蓮寺

鳳臺縣志篆書佛頂尊勝陀羅尼經幢九大字以下楷  
書經文筆勢遒勁後列弟子太原軍招信都廂虞侯郭  
存實以天佑十七年庚辰歲暮因巡遊到此仰睹名山  
瞻眺樂界發願在羅漢樓建立經幢伏願煙烽早息鐵  
騎罷征四民樂業五穀豐登時天佑十八年辛巳四月  
丁巳朔十一日丁卯郭存實立石後唐稱天祐十八年  
明年爲莊宗改元同光而梁亡又考唐兵制神策軍有  
殿前左右廂都虞侯等名李晟劉希暹曾任之唐末藩  
鎮跋扈多私相署置郭存實亦其類也記稱願煙烽早  
息等語是時梁晉日尋干戈四郊多星存實蓋有感而  
云也

五代晉

繼光和尙石幢

天福五年 今在鳳臺縣寶山寺東南玉皇廟

鳳臺縣志幢二面前云師法諱繼光俗姓王氏晉城縣人出家五臺度脫俗眾公爲建後書時天福五年五月一面書僧徒支派文用駢體多俚句書法亦劣

元泉寺經幢

天福十二年 今在鳳臺縣

鳳臺縣志前書佛說觀彌勒菩薩上生兜率天經後書天福十二年丁未十二月日立幢內字完好其所云天福十二年則後漢高祖元年也晉高祖天福共八年改元開運至此四年矣漢建國而未有國號又稱晉年號

舍開運而追續天福爲十二年歐陽子以爲甚無義理  
書之以紀其實

漢

師姑經幢

乾祐元年 今在鳳臺縣元泉寺

鳳臺縣志幢贊真言經特進鴻臚卿不空三藏所譯也

前序師姑本賈黎城人系出瑯琊王氏幼離情愛長慕

清虛雲遊南北於缺砂城里缺莊買置地基撥土住持

三十餘載圓寂後得舍利壹柒粒度脫門徒今建塔幢

固圉當院師靖德等立晉乾佑元年戊申八月日建考

乾祐爲漢隱帝年號去年丁未高祖仍稱晉天福十二

年至本年二月改爲漢矣石幢立於八月復稱晉或深

山中不知改號也師姑支派不云僧徒疑見尼師

周

菴雲觀經幢

廣順三年 今在鳳臺縣郭莊

鳳臺縣志幢書法頗佳文亦明晰可辨上刻佛頂尊勝  
陀羅尼經并序前列時周廣順三年歲次癸丑十二月  
丁未朔二十九日辛亥清信弟子匡時効義功臣龍驤  
指揮銀青光祿大夫檢校戶部尙書兼御史大夫上柱  
國武威縣開國郡公食邑一千戶郭思俊考思俊名不  
見於五代史宋史開國功臣亦無其名今其地尙名郭  
莊或思俊故里云

宋

唐興寺經幢

開寶七年 今在聞喜縣東鎮

長興寺殘幢

開寶中 今在潞安府

長治縣志幢書陀羅尼經有頌并序文殘缺不可讀前

有徵事耶試大理評事缺中正字蓋撰文者後題開寶

缺年龍集缺三月九日建立

昭化寺經幢

太平興國九年三月 今在壽陽縣方山

保甯禪院經幢

清化二年 今在聞喜縣東鎮

聞喜縣志幢書陀羅尼經院即唐興寺也清化元年改



名

觀音寺經幢

至道二年 今在代州東張村

代州志幢書五臺山燈臺頌柱國張處貞後書大宋至道三年二月二十五日重修東張村主戶老人等一萬刻佛說大佛頂尊勝陀羅尼經幢製造甚精撰文之處貞結銜但書柱國考柱國爲勳階次於上柱國文武官二三品者用之則亦一時之顯者也而文乃純作釋子語殆指紳之信心皈依者州中所存石刻以此爲最

先

旌忠廟經幢

天禧四年 今在澤州府城

鳳臺縣志書尊勝陀羅尼經稱天禧四年歲次庚申三月壬子朔九日庚申建石碑書左右錄僧慶讚願皇帝萬歲官慶民安後列邑人錄行錄事衛文進嘗考旌忠廟立於徽宗宣和間而真宗天禧時已云建碑疑爲古寺所改其云錄事衛文進者蓋邑人官錄事參軍者也

宿鳳臺石幢

天聖三年 今在鳳臺縣李村

鳳臺縣志可辨者十一字天聖三年

下鳳樓李村缺院

僧德

錄

考天聖三年宋仁宗丙寅其云鳳樓李村因村

有宿鳳臺據府志晉太始元年有鳳見於此而晉書則祇云郡國鳳鳳見未嘗專指高都今宋石幢已有鳳樓等字不知何據

保甯寺經幢

天聖六年 今在聞喜縣東鎮

謙法師塔幢

慶曆七年 今在鳳臺縣

鳳臺縣志石塔幢記稱尙謙法師俗姓錢住錫茲山設

座開講後云慶曆七年丁亥

三寶和尙經幢

今在澤州府城西五龍宮

鳳臺縣志上書尊勝陀羅尼之幢第一行書同上二行

首缺五字可辨者皇唐錢天復贈司空大辯之寶幢三

寶和尙奉本行下缺三行以下皆經文尙存二百餘字

餘皆剝落考三寶爲朱祥符高僧傳大辯所譯眞經爲

立石幢而司空係天復所贈亦如不空三藏特造鵝  
卿也案元符石幢三寶當沒於天聖年幢不知立  
於何時志題爲唐幢誤姑附仁宗諱刻之後

青蓮寺石柱題名記

元祐四年 今在鳳臺縣

鳳臺縣志前列北村社尙書杜選謹施石柱一承爲供  
養男杜昌等元祐四年十月記又有石柱題名二記一  
係元祐四年十月二十六日一係十月十日內曲村成  
恭施石柱一南下社田頭翁蘇簡並崔家社崔應施石  
柱各一

法輪院經幢

紹聖五年 今在鳳臺縣松嶺山

鳳臺縣志幢記稱師法諱惠能俗姓王落髮爲僧得授

真戒杖錫南遊買置經業紹聖四年特命工取石置佛  
頂尊勝陀羅尼經幢請賢士悟真直書貞記時大宋紹  
聖五年四月日後列師姪門人俗兄等名

三寶和尚塔幢

元符元年 今在鳳臺縣寶山玉皇廟

鳳臺縣志字多漫滅其可識者如姓何諱三寶大中祥  
符五年出家缺至天禧四年缺大會四方缺天聖四年  
七月初十日兩手成文面如金色缺後云元符元年十  
月建立

青蓮寺石柱題名記

元符三年 今在鳳臺縣

鳳臺縣志從後逆書元符戊寅十月十四日高平郡別

乘河南段紹同晉城令耿敏尉黃叔敖因按田自瑤  
溪至青蓮寺登鄒筆臺步月臨流傳觴賦詩明日去宿  
景德寺考宋無高平郡蓋澤州而書古郡也案官邑並  
爲不合又改別駕爲別乘而稱臺中登臺  
法題名至稱爲伴車皆一時之陋習也

又記

崇甯元年

鳳臺縣志前書石柱一禾爲供養熙甯九年至崇甯元  
年二月初九日不書施主姓名考熙甯九年爲神宗丙  
辰崇甯元年爲徽宗壬午石柱非一時所施或至徽宗  
時始告竣

又記

宣和七年

鳳臺縣志從後逆書陳子鏗子庚賈山王越胡考甯神宗清以宣和七年十月十四日同遊道達上人啟元不期而會遊人俱不可考宣和七年徽宗乙巳金兵圍太原明年爲欽宗靖康元年金兵犯澤州高平當此時登臨山水眞所謂燕雀處堂不知大廈之將傾也

滿公大師石幢

靖康二年 今在汾陽縣小相村

汾陽縣志幢記僧智清述稱法師諱義滿字叔謙俗姓郭本邑零藏人父母舍送小相里靈岩院禮僧道甯爲師治平四年比試經業合格十九落髮二十具戒哲宗興隆節內降紫衣靖康二年十月初九日無疾而滅案靖康二年四月二帝蒙塵高宗卽位南京改元建炎是

靖康二年無十月也且靖康元年金婁室陷汾州州境已屬於金記年者當書金天會五年而仍書靖康二年豈遺民未忍忘故國若然則存晉亮節得於繼往矣

遊

舍利塔經幢

開泰八年 今在天鎮縣慈雲寺

謹案塔幢刻無垢淨光陀羅尼經詳見沙門崇雅舍利塔碑

晉同塔經幢

太康二年 今在大同府上華嚴寺

大同府志幢高五尺徑尺餘方隅八面面各有字其略云佛頂尊勝陀羅尼經尉賓沙門佛陀波利奉詔譯立



輓人司文顯本山普同塔立在城西楊柳坡東至官道南至溝西至山頂北至溝周匝爲記惟太康二年歲次丙辰十月小甲申朔十七日庚子日庚時記案此非寺中物楊柳坡未詳

武州舊寨經幢

壽昌二年 今在五寨縣北五十七里

五寨縣志大舊寨往三岔路傍有古廟石柱刻云唯壽昌二年二月十五日立佛尊勝幢知縣秦雄夜有古尊勝幢詩注郡志云壽字中泐惟上下可辨古無壽昌之號疑是北魏孝昌二年也

謹案遼道宗大安十年改元壽隆以避聖宗諱作壽昌又別作昌壽據幢則確爲壽昌也志未詳考

金

日塔寺石柱題字

天輔中 今在歸化城東故豐州城

朔平府志華嚴經塔一名白塔下有石香亭柱刻金天  
輔年號

柏林寺經幢

天會三年 今在代州

代州志幢書大佛頂尊勝陀羅尼經無書人姓名

郭公塔石柱題字

正隆五年 今在歸化城西南八十里

朔平府志塔下石香亭柱上刻大金雲內州錄事司郭  
公諱說字本缺正隆五年明經進士王天佑撰開學堂

守貞書 案此當是墓間物移之寺中者既列撰人姓名當有表并之文矣

琵琶寺經幢

大定中 今在風臺縣

鳳臺縣志惠銓和尚所建也記稱惠銓崑崙人出家五臺山卓錫於此造殿閣二十所度僧眾千餘人寫真經總計六百七十九萬七千字大定年月日眾社共爲立幢後書尊勝陀羅尼經

湯廟經幢

大定二十二年 今在長治縣中村

長治縣志幢刻多羅經末題大定二十二年歲次壬寅正月初八日丙辰郭奎元書

興唐寺經幢

明昌六年 今在開喜縣東鎮

應州錄事劉筠墓石幢

泰和三年 今在應州城隍廟

大同府志劉筠墓志宋澤撰略云應州賓賓里劉愈詮將合葬其父母來以問銘於余明昌六年葬於金城之東今再卜泰和三年合葬於上瑞鄉白家堡東原之下子三人長曰愈詮次曰愈安三曰愈勵志石爲柱形方隅八面高二尺許徑一尺亦古所罕見者

古柏下石柱題字

泰和七年 今在平遙縣胡村

平遙縣志胡村古柏方圍二丈五尺一枝西向如老龍以石柱擊之一柱泰和七年一柱嘉靖三十年一柱唐

滅不可識

青蓮寺石柱題名記

承安五年 今在鳳臺縣

鳳臺縣志河間許道真古筆也記稱承安二年閏二月十六日同張君玉吳壽夫來遊遂與寂公無二登鳳凰山周覽青蓮之勝鈞幕河間許古題考古父安仁以明昌五六年出守澤州古於明昌五年登詞賦進士第承安間正安仁節度汾陽時也考古本傳宣宗貞祐初自右拾遺拜監察御史距登第時已十九年或此時隨侍父任否則作此郡幕職記中稱張君玉吳壽夫僧寂公大抵爲進士張天祐吳芝寶家和尙皆其父所與遊者記又稱登鳳皇山安仁詩亦云卧看月落鳳皇山山名

不可考據寺僧云卽青蓮寺山以山形名

青蓮寺石柱詩刻

興定五年

鳳臺縣志詩七律後書牛文郁題王炳書興定辛巳清  
明日刻考宣宗本紀興定二年戊寅元兵攻澤州五年  
正月攻天井關兵戈擾攘之際賢如李莊靖尙多避亂  
中州牛文郁等何人乃安若無事作此勝遊耶

元

王氏墓銘經幢

至正四年 今在繁峙縣聖水村

繁峙縣志幢前題大元冀甯路代州雁門驛提領王公  
祖考先德之銘後書時至正四年孟夏上旬十八日雁

門驛提領王思問立石冀甯路儒學正宣授中衛親軍  
都指揮使司儒學教授緣勳撰文子緣克思述冀甯路  
堅州里榮遷大同路揀范添督工兼撰尊勝呪之銘冀  
甯路堅州里宣授中武校尉大都路同知涿州事張讓  
書丹次書高曾世系次書佛頂尊勝陀羅尼神呪末贊  
五言韻語二十字案此幢與堅州副元帥王兆碑爲一  
豕物而文則迥迥且標題旣曰祖考先德而專頌思問  
殊非體裁又先德之稱始於唐猶先考也此曰祖考先  
德亦不甚合

華巖洞石幢

今在陽城縣城南華巖寺字首漫滅見舊通志

不詳時代  
以下同

崇福寺經幢

今在青陽北三十里西可村

青陽縣志幢高丈餘上鑄金剛經住持妙法等造

陀羅尼經殘幢

今在孝義縣玉屯村道旁

應州二經幢

一在關帝廟一在城隍廟

大同府志古石經柱皆八角蓋遼金時筆

棲巖寺六經幢

今在蒲州府東南二十五里

蒲州府志寺外石幢六已折其一幢皆刻梵經不知何

人書大要隋唐時也案所云梵經蓋陀羅尼經况唐以

語三百餘字者安得以爲隋物志成於乾隆中當時六  
幢僅折其一則其他幢文年代必尙可辨議棲巖號名



刹士夫人所時  
至幸一番視也

右幢柱

古銘

湯陵銘

舊在榮河縣北四十三里

寰宇記蒲州寶鼎縣殷湯陵後魏太和中  
有縣人張恩破陵求貨其物多是鐘磬及諸樂器  
再得其銘恩恐人知以銘投之汾水  
後事洩爲主司所理乃於水取得其銘銘曰  
我死後二千年終困於張恩由是執事不復深加其罪

飛廉石棺銘

舊在霍山上

水經注飛廉以善走事紂惡來多力見知周武王伐紂兼

殺惡來飛廉先爲紂使北方還無所報乃墮於霍太山而  
致命焉得石棺銘曰帝令處父不與殷亂賜汝石棺以葬  
死遂以葬焉

### 元圭石題字

舊在平陽府

宋史五行志政和二年元圭始出晉州上一石綠色方三  
尺餘當中有一文曰堯天正其字如掌大而端楷類手畫者  
堯字居右天正字綴行於左都堂驗視磐石三分而字盡  
愈明又於堯字之下隱約出一瑞字位置始均蓋曰天正  
堯瑞云或謂晉州堯都也方元圭出乃有此瑞時蔡京當  
國譚稷經  
營河東至晉州得異物於民間歸以進京謬爲天所錫禹  
元圭帝命行朝會禮受圭於大慶殿赦天下進封京魯國  
公

天淵池石銘

元康六年 舊在大同府北

魏書文成帝紀興安二年二月發京師民五千穿天淵池  
獲一石銘稱桓帝葬母封遠近赴會二十餘萬人有司以  
聞命藏之太廟 序紀桓皇帝諱猗叡統一部居代郡之  
參合陂北二年葬文帝及皇后封氏晉成都王遣從事田  
思河間王遣司馬靳利并州刺史遣主簿梁天並來會葬  
遠近赴者二十萬人

謹案通鑑晉惠帝元康五年索頭分其國爲三部卽  
猗叡居參合陂之歲也文帝名沙漠汗爲拓拔始祖  
力微世子嘗質於晉朝士英俊多與親善國人忌其

才藝白力微害之故猗也既爲部長於次年改葬也  
序紀所云蓋皆本之石銘天淵池後名靈淵池在方  
山側

後魏

井榦題字

太和元年 今在聞喜縣西三十五里

聞喜志補石在柏林村井上以轄轆轤軸者四字書蹟  
倔強有隸意知魏太和非唐太和也爾時稷山亭尙屬  
縣地故此村正在中間不十年而割爲高涼村遂成邊  
境矣觀此石如見爾時事

永固堂石屏風題刻

太和中 舊在大同府北方山上

水經注嶺上有文明太皇太后陵陵之東北有高祖陵二陵之南有永固堂堂之內外四側結兩石跌張青石屏風以文石爲緣並隱起忠孝之容題刻貞順之名

皇信堂刊題

太和中 舊在大同府

水經注太和殿之東北接紫宮寺南對承賢門門南卽皇信堂堂之四周圖古聖忠臣烈士之容刊題其側是辨章卽彭城張僧達樂安蔣少遊筆

張氏隧道石記

舊在武鄉縣東原上

武鄉縣志張氏燕國公王文謨之母也明崇禎中於東

原得之

案文謨不見於史志據石記知爲北魏人惜其文不傳也

長城石刻

開皇元年 舊在尙嵐州

舊道志州北五十里俗名長城梁明嘉靖間得石刻云

隋開皇元年贊皇縣丁夫築

案寰宇記嵐州魏樂縣長城隋圖經云因古迹修築

起合河縣北四十里東經嵐州延袤千里合河今興縣在州西南卽此長城也

開皇十年

元和志汾州靈石縣本漢介休縣地隋開皇十年因巡幸

傍汾開道取其平直得石文曰大道好吉因分置靈石縣

以今縣西獲瑞石爲名

受瑞壇石文

大業十三年 舊在太原縣

元和志并州晉陽縣受瑞壇在州理倉城中義旗初高祖

神堯皇帝受瑞石於此壇文曰李理萬吉

案理當作治避高宗諱也太平

寰宇記作淵誤

唐

逍遙樓題字

大歷五年 顏真卿大楷舊在蒲州府

蒲州府志逍遙樓舊有顏魯公大字石刻

案今廣西臨桂有摹刻三

大字額字徑二尺七寸後晉大歷五年正月一日顏真卿書

鑄錢監石記

今在稷山縣三靈侯廟

高徹故宅石記

今在稷山縣西南勳重村

稷山縣志門獬二乘石一向存土人掘得石碣上鏤巴陵公孫薛貞筠上柱國承知左都騎上柱國獎德滿騎都尉德貞左驍騎尉元簡上騎都尉元封元亨元裕元景元高或其苗裔也

朱邪府君墓志石蓋字

今在應州儒學

曝書亭集丁未之秋自代州復至大同將次應州避雨馬神祠下前有施石臺刻石列八卦於旁又書二十八宿字心異焉俾從者覆而觀之上有篆文曰唐故汾州刺史朱邪府君墓志銘考後唐家人傳無官汾州者惟明宗之父電嘗贈汾州刺史見冊府元龜又葬於應州其爲電墓銘



無疑史稱明宗無姓氏太祖養以爲子不知其父冒姓朱  
邪者久矣後明宗卽位謚其考曰孝成廟號德祖當其時  
祠官之守春秋之祭山陵之封土未必不崇孰意爲人所  
發千載之下并石函亡之而僅存其蓋也乃言於按察副  
使曹公徙之於州學而爲文記之

案舊五代史明宗父名覽此作覽疑誤

五代

北漢園陵題額

舊在太原縣西南三十里

舊通志北漢劉氏墓在天龍谷中其額有大漢英武皇  
帝園陵八字明宏治間爲寺僧所毀

宋

河亭題名

天聖六年 舊在翼城縣潞公軒

舊通志文潞公爲翼令創建河亭臨城堞滄溪蓮抱  
山光林木森布巽之勝概此亭爲最潞公親書名記猶  
存在城內按察分司一云在藩署內

潮洞莊題名

元祐三年 今在夏縣青臺禹廟

夏縣志其文云舜民與希道約之自餘慶禪院遊石碓  
山寺回過萬石莊觀太師溫國公題識元祐三年孟冬  
中浣文江與行凡四十三字

禹王廟題名

元祐四年 今在夏縣青臺禹廟壁

夏縣志係八分大書其文曰且光乙丑四年三月七日

來謁禹王祠凡十五字後小楷書先大中河內公太師  
溫國公頃成同謁夏禹祠大師公因留題於殿之西壁  
元祐己巳鄉人李權刻諸石凡四十字案李權跋云頃  
歲則是元豐入  
年乙丑而溫公何以書乙丑四年若以前乙丑則爲天  
聖三年亦不合也考溫公生於天禧三年己未當天聖  
乙丑甫七歲時兄且年二十矣豈是年兄弟書同謁廟  
至元豐中溫公再來書其事偶誤三年爲四年耶近聞  
武授堂金石二跋乃云元豐乙丑後四年爲哲宗元  
祐四年是不知溫公以元祐元年卒矣何其謬也

福巖院題名

紹聖三年 今在鳳臺縣

鳳臺縣志郡守王元等遊福巖院題名記紹聖丙子十  
月二十八日次年丁丑又觀琵琶法題名此記同遊者  
有判官鞏瑗晉城令耿敏司理李祐前臨州司理張開  
州學正陳珣與後遊姓名不同

琵琶法題名

紹聖四年 今在澤州府城天慶觀

鳳臺縣志前列郡守王元舜弼倅車桂順孫毅夫再遊  
崆峒觀琵琶滋前隰守劉程公範同至巡警馬誠之慎  
思郡幕劉行之行中民掾陳諤昌武法掾鄭珩君瑞邑  
尉黃叔敖嗣深從紹聖丁丑歲乙巳月丁亥日舜弼題  
楷書甚古考宋職官志州設知軍州事一人通判一人  
外有司戶司法幕職巡警等官記所謂倅車者通判巡  
警者捕盜巡檢官郡幕者幕職官掌神贊郡政總理諸  
案文移其民掾法掾則戶曹法曹各參軍爲今之經歷  
縣尉則今典史也

龍泉題字

有陰

大觀三年 今在鳳臺縣五龍宮

鳳臺縣志篆書龍泉二大字前隸書宣議郎權通判軍

事許奉世弟學書隸學異篆後書大觀三年秋七月丙

辰朝奉大夫知州軍管司學事衡規建據碑則爲學異

篆書非奉世筆也府志直作奉世篆誤矣又碑陰行書

爲金崇慶改元五月十五日真定宋雄飛以憲司通判

郡事同司戶呂華遊柳溪謁祠下移碑於正門之西作

誌以記

馬峪泉圖題字

大觀中 今在河津縣署

瓜峪泉圖題字

大觀中 今在河津縣署

河津縣志遊馬峪泉水瓜峪泉水各有清濁二渠築自唐時清水泉出灌近山南北二午芹民田濁水待天雨窳壑水流灌僧樓南方平孫彪東長光德下停清澗等里民田宋大觀間刻石圖置縣廳今尙在焉

大觀題名

政和三年 今在澤州府城

鳳臺縣志行書九大字朝拜時庚因按部到此細楷書二十字政和三年重五日儒林郎司士曹李倪摹勒上石按宋職官志州設士曹一人或蔭敘起家不嘗置至道初罷司理院置司士職比參軍至所謂朝拜時庚蓋道家語也是時崇尙道教君嬖臣恬州縣靡然從風國是之非可概見矣其內又有政和七年蔡京書額

金

興福寺石塔題字

大定六年 今在壽陽縣狄那村

壽陽縣志寺在草溝村北嶺寺左有石浮屠上記金大定六年字樣

知足齋並潞公温公畫像題字

大定十七年 今在夏縣温公祠

夏縣志係温公手筆旁刻温公並文潞公小像案石爲  
丁酉安昌姚弁模刊知足齋三大字以隸法書之左爲  
潞公像上題崔台符瓊林苑錢行詩右爲温公像上書  
公自題寫真詩其前又有元大德  
十一年建魯花赤塗木丁等題記

梁甫廟門欄題名

大定中 姓名剝落今在鳳臺縣高都鎮

華嚴經塔題字

今在歸化城東白塔寺

朔平府志塔在歸化城東五十餘里石額篆書萬部華嚴經塔

金牌僉戶劉公墓額題字

舊在稷山縣下桐村

稷山縣志劉公墓嘗掘土見羨門砌以琉璃瓦題額金牌僉戶

謹案金志太祖收國二年始製金牌以授萬戶然則此劉公乃僉萬戶者在猛安謀克之上知爲劉公似別有石志也惜不傳



清和真人仙號石刻

大德元年 今在平遙縣清虛觀

平遙縣志清和子手書三大字極似長公又郝真人十

二大字並在觀案清和真人志佚其名邱長春弟子也

真人嗣掌大教四方籍冠之單清信之流莫不焚香設

禮以求真人親筆仙號手字以爲保佑辟邪之寶燕京

大長春宮提點大師夏志誠意真人年老倦於批寫遂

將親筆仙號手字刻諸翠珉已立於長春宮吾邑太平

興國觀亦真人主持之地是以提點大師蕭德冲亦次

彼而立石焉云云其郝真人名志松號冲虛真人手書

亦未見拓本姑附存

趙山元好問題名

大德六年 今在平遙縣

平遙縣志元遺山先生題名石在趙山題云己亥秋八

月十有四日自太原道往山陽留宿於此東山元好問

裕之題字如拳大隨意而書溫仁甫有後敘通辨大師  
院主廣演立石一日遊山偶於林莽中得之手迹宛然  
喜而欲狂不意空山斷石有此二十八字

謹案寰宇訪碑錄有大德六年古陶禪院元好問題  
名行書在陽曲縣考陽曲無所謂古陶禪院者當卽  
起山刻石由平過本漢平陶避後魏太武諱改平過  
鄉俗每稱其縣曰古陶孫氏不察誤爲寺名又臆斷  
爲在陽曲也已亥爲蒙古太宗十一年遼山集有倪  
莊中秋詩當成於題名之次日其地似在武鄉矣又  
有十一月十三日雪晴讀書山東僉看月詩則是年  
仍自山陽歸里其自署曰東山蓋卽讀書山也

清和真人畫像題字

今在平遙縣清虛觀

平遙縣志後書蓮魯花赤與梁社諸公及夫人于孫姓  
名甚多夫人皆受教各有法名元世之崇信蓮教如此

昭君墓石案題字

書在歸化城南二十里

筠廊隨筆嘉禾曹秋岳溶嘗至昭君墓墓無草木遠而望  
之冥濛作然色古云青冢良然墓前石案刻某閼氏之墓

爲蒙古書秋岳考譯最詳分擗數紙歸奉使日記明如墓

古字譯爲刺麻所作歸程志略思所見若石壘未知是否  
證案之遺爾時亦未檢有字否也案朱氏謂秋岳有勘本  
則無論何物確有題字爲元  
人所書亦無可疑錄以俟考

竹林寺舍利石匣款

舊在五臺縣中臺寺

志略明成化間耕者掘地得石匣內藏銀匣中儲琉璃瓶  
盛舍利數百顆匣上刻僧雲宗寶藏字不知爲何代案唐  
大厯五年釋法照止五臺佛光寺見白光起北谷照卽依  
光行東北里澗下有石門童子出日來何遲也引渡溪橋  
文殊示以念佛三昧命布人間照方喜開眼聖境條失因  
創寺志之世所謂悟入化竹林者此也此匣款豈亦唐時  
僧徒所爲耶

法雲菴石座款

舊在五臺縣中臺山

清涼山志菴卽古彌陀菴慈山大師德清居此清幼時人  
呼爲清卽萬厯乙亥清借友妙峯卓錫菴中掘地獲石座  
上勒清卽居三字

禹蹟圖石志

今在稷山縣關帝廟

稷山縣志石志在保真觀石橫二尺五寸爲方七十一  
豎三尺爲方八十一共方五千七百五十一每方折地  
百里志禹貢山川名古今州郡名山水地名刊刻極精  
今移砌關帝廟案關中金石記有此圖爲齊阜昌年  
所刻卽金天會之十五年丁巳也畢氏  
以爲宋以前相傳之舊本爲地圖之僅存者此石志不  
詳爲何代所刻疑亦關中之摹本也惟彼圖方廣各三  
尺餘此石旁測非得墨  
本不能別其同異也

右石題

後魏

壽聖寺造像題字

元象元年 今在和順縣寺頭村

謹案碑鵞像二十五列每列像十七石邊棱題字一行可辨者爲大魏元象元年歲次壬午十月丁亥朔  
字二日辛酉合邑諸母一百字二共造像一區爲  
國主師僧父母下元象東魏孝靜帝五年改元也魏  
碑版率皆作魏此作魏爲篆文正書師作師見漢隸

### 卅邱氏造像記

今在聞喜縣邱村

聞喜縣志右石上有神像下二列刻人之拱而立者各有題名最下有文三十行行七八字不等石高四尺寬三尺在邱村卅古卅邱村西門外大半陷土土人以爲補其村口風水不聽掘視強掘審之似石尙長而斷者雖剝泐不復成文其存者猶粲然在目知魏東子孫所造也

中母邱氏人甚夥而可見者只法顯龍生二人案三國志注載儉子宗入吳吳平復還中國宗子奧巴東監軍蓋州刺史觀此石中間數行意像卽奧所造其文有岐岐如神龍等語皆言仲恭忠魂在天死而不泯又曰臣僚增而下泐一字意是悲痛等字臣僚增痛自是爾時語萬國云云見天下傷之七族云云乃故里哀之者也母邱氏墓卽在其村後母邱山其子孫云當時司馬子元掘其墓四陲而溝之矣巡視良不誣又別石在黃花洞作魏體或此亦魏石歟

母邱氏造像別石

今在聞喜縣邱村

聞喜縣志石石上刻佛像下刻人名四面皆同高五尺

寬二尺厚一尺在邱村黃花洞此洞前爲寺而洞口在  
母邱山腹深莫可測舊志云是梁時高僧寶誌所居亦  
未見有確證惟明人碑引郝后爲蟬而誌公爲之懺悔  
始得超生既不足證誌公之居此地又小說不根之言  
未可以入志也此石無文義僅有人名百餘而母邱氏  
十之九兼有郭舍貴王匡女二名與前石相同知一時  
所造不知何時分爲兩地一在此一在彼今又合歸一  
處正如劍合延津是又此石之幸也

謹案前記稱世

上下各

祖母邱儉皇朝

缺二字

晉鎮東

將軍揚

缺

二州刺史太尉

缺二字

侯

缺

居此邦考三國

志本傳儉曾封安邑侯又嘗爲鎮東都督揚州軍事  
又領豫州刺史則揚下所缺當是豫字太尉下所缺



當是安邑字悉與史合惟在異代尙稱皇朝當由拓拔建號以先世與魏和親改代爲魏天興元年詔云宜仍先號以爲魏焉蓋當時因典午南遷自以承東都舊統也以此證石爲後魏所刻或無疑也

北齊

崇勝寺造像碑

有陰及兩側

天保三年 今在汾陽縣大相里

汾陽縣續志石碑鑿龕造像凡三層自第二層龕以下及左右兩側俱列人姓名碑陰有造像記並頌漫滅殆盡末署云大齊天保三年歲次壬申正月十五日造像願皇祚永隆七世眷屬逮及邊地咸蒙斯社題名可識者凡七十六人重見者三人有官位者爲前平陽太守

任霖清開府行參軍相里叔悅給事

缺二字

求前

缺二字

太

守杜寶相前祭酒從事史相里繼宗將作大匠王顯貴  
華州西曹書佐相里山洪隰川令相里榮鎰前廣州長  
史任升前西河太守相里興龍前新興太守相里刀生  
隊主虵姪相周檀越之稱曰都大像主曰上中下龍像  
主曰左金剛主曰當陽大像主佛弟子曰迦葉主曰阿  
難主曰寶聖主曰交龍主曰都邑主曰都維那主曰都  
檢校維那主曰左師子王主曰左寶塔主曰左齋主曰  
寶瓶主曰左神龍主曰光明主曰香爐主曰神龜主曰  
右神龍主曰右寶塔主曰右師子王主曰邑義香火主  
曰雜那日邑子寺職之稱曰邑師曰供養主比邱金石  
萃編曰凡造像人稱佛弟子出資造像稱像主茲碑諸

稱謂皆北朝造像碑所習見惟都大像主外前

像二字太

守杜寶相署當陽大像主佛弟子爲初見豈卽總持斯  
事之人耶碑中別體字像作鴿龕作堪春作春左作左  
剛作崗叔作叔矩作矩方作力惠作德荆作荆桃作桃  
珍作珠蛇作虵虎作虺邊作邊跼字無考青蒲王氏北  
朝造像論曰典午之初中原板蕩繼分十六國沿及南  
北朝干戈擾攘民生其間蕩析離居迄無定字幾有尙  
麻無訛不如無生之歎而釋氏以往生西方極樂淨土  
上昇兜率天宮之說誘之故愚夫愚婦相率造像以冀  
佛佑百餘年來寢成風俗觀是說可以知造像之緣起  
矣茲碑歐陽以來從未著錄

國朝甲寅顧亭林先生來遊吾邑見之載於金石文字記

始顯於世乾隆中戴東原先生修汾州府志據以列諸

祠廟類

宋碑正書府志據金石文字記作八分書或據所見碑陰也今磨滅無字迹矣

張祖造像記

天保四年 今在聞喜縣東鎮

謹案石爲戈背侯所訪得者石像下小記中有云佛

弟子張祖爲亡女買缺及家內大小因緣眷屬缺割

資財進造石像一軀今得成就仰爲皇帝陛下國缺

永隆云云書雜隸體內軀作暹成就作城就陛下作

陸下皆謫字像右旁刻天保癸酉四月缺戊辰石側

則弟姪妻女名也皆贊一心供養佛時六字

李清造像記

天保六年七月 釋仙書今在平定州石門口

志略北齊李清言爲趙郡文靜公李憲文簡公李希宗造  
像勒石在州東三十里石門口山崖上金石諸家從未著  
錄余於同治戊辰春獲觀於友人戈青侯處碑甚完好無  
一字殘缺書法清古有魏樓梧之風尤爲可寶

謹案李憲及次子希宗魏書並有傳在唐表中爲東  
祖叙之後清言未知於李氏何屬而爲其父子造像  
又何以立石於此非見拓本無由審定也

尼如靜造像記

天保七年 今在太平縣南高村

謹案石舊爲洪洞董氏所藏今歸太平劉氏佛像下  
記云大齊天保七年歲次丙子閏月癸巳朔二十四  
日丙申佛弟子比丘尼如靜爲亡師比丘尼始觀願

造無量壽佛聖一區願令亡者託生西方妙樂佛國  
與佛局面觀諸佛見存者受福無量共成佛道字方  
整完好無一缺拗

陽阿故縣造像記

河清二年 今在鳳臺縣大陽鎮

鳳臺縣志碑製四棧上下皆鑄佛像空處細書施主姓

名前有小記大齊河清二年歲次癸未五月甲午朔十

日戊寅陽阿故縣村合邑長幼等敬造石缺華像一軀

寶相嚴麗借此功福上爲皇帝缺僧七世父母因緣眷

屬通地四生咸正缺以下考河清二年爲世祖癸未後列

東兵參軍長流參軍功曹中正長史縣令等官齊書未

志職官其制皆因北魏書法雜用篆隸日月等字與唐

武后時同知十二字非盡武后所造也

北周

檀泉寺造像記

保定二年 今在聞喜縣寺底村

聞喜縣志佛像石座縱橫俱三尺許高尺有二寸三面有字光緒初元邑人員外郎楊深秀州判潘夢鳳共自地中掘出者此村依山有泉可灌田二頃水經注之仲郵鄉也今詳寺名檀泉雖彼家語要是因此泉名之耳寺不知何時已毀無復遺迹村之名寺底遂不可復解文中豐利公宇文貞乃明帝第二子而周書只作鄧國公亦不言其爲刺史自當以石文爲準

案文云絳州刺史龍頭城開府

儀同三司豐利公弟子宇文貞奉律

偶撫莖帶岳

口佩藍共崇

口敏造等身

口像一區絳州木後

東雍州周明帝武成二年移置於龍頭城至是題名有

時任三年故猶稱龍頭城在開喜東二十里題名有

一字或作顯或作額字書所無都邑中正者亦當時制

度州大中正率以刺史兼之縣中正率以令長兼之然

多是士著故裴氏屢有爲縣及州郡中正者此云都邑

中正乃其屬也宋唐左面題名官職有蒲坂令董號鳳

右面餘皆邑子亦有累邑主者其都邑中正董延和在

左面則像主齋主化主供養主也貞事佛精懇如此而

不免見害於楊氏且轉瞬已移其神器彼佛何不大展

兜羅緋手一援之耶韓昌黎云佞佛無益信矣貞也地

則宗親官爲冢宰使早爲備何普六姑之能爲也不知

出此而務造像邀福且題曰願皇基永固終能固耶否

耶雖然造像是魏以來習氣至唐未改亦不必但以責

貞矣



隋  
張村造像記

開皇十五年 今在壺關縣大會村

壺關續志石分五層文刻首層存二十六行行七字首

行大隋字高二格書

文可辨者大隋開皇十五年歲次癸丑十月戊辰己卯日張村合邑

義施人敬造釋迦像一堵末云合義施人等住居口旱之地願口泉干地而生云云

第二層刻佛

像七區每區之旁皆有題字凡九行中題當陽大像主

左題左相阿難主菩薩主迦葉主等名右題大齋主剛

像主副齋主等名第三層亦刻佛像七區題字九行爲

願成記主買都邑主開佛光明主都福德主等名第四

層題名八行與第三層字相接爲邑子等名第五層題

名二十一行名皆冠以邑子其碑陰刻妙法蓮華經普

門品五百餘字末書大隋開皇十五年歲次癸丑十月  
戊辰己卯日立石

胡叔和造像記

仁壽二年 今在鳳臺縣北村興龍寺

鳳臺縣志隋石佛記前書大隋仁壽二年歲次壬戌十  
一月甲辰朔二十四日佛弟子胡叔和撰碑刻佛像三

上列施主男婦姓名與東淑村開皇年碑製同案開皇

乃姓也見檢姓記中文義爲文帝祈福并及先世宗祖所云仁

壽則文帝復改號之二年

唐

史暉造像記

顯慶四年 今在曲沃縣大李莊石佛寺

曲沃縣志文云清信女史暉爲亡夫解憑仙造

母邱元貞造像記

總章二年 今在聞喜縣

謹案石爲縣城張氏所藏像下四面有字云總章二  
年七月十五日佛弟子母邱元貞爲亡父敬造彌陀  
像一區上資皇帝下潤倉生同出善原咸登樂道後  
列姑妹名而先以外祖及母其上額三面書供養主  
皆元貞本宗伯叔名也

裴居益造像記

咸亨三年 今在曲沃縣大李莊石佛寺

曲沃縣志像爲唐裴居益兄弟造舊在聞喜晉公祠後  
移於此

張善思造像記

永隆二年 今在鄉甯縣關廟

鄉甯縣志石高尺許舊在昭遠寺小楷甚工

司馬山彌勒石像碑

永清二年 篆書舊在澤州府

謹案趙明誠金石錄收此碑無撰書人姓名又鄭樵通志金石略及朱長文墨池編並著錄而不詳年月書畫譜據以採入列爲三碑司馬山在府城東八里丹水所源也鳳嶽志於境內碑版輯錄最富不應答錄名刻反致漏遺今詳考之乃卽澤州之碧落碑也金許安仁碧落寺溪堂記略云永清二年韓王元嘉三子黃公讓爲母妃房氏祈福刻石彌勒像側蓋後

絳州刻十一年也永淳元年爲高宗壬午次年癸未十二月改元宏道石自刻於改元之前鳳臺志謂無二年誤也碑在碧落山爲摩崖而德父譌爲司馬山遂不知與絳州碑爲一事若鄭氏朱氏則據趙錄而又加略耳

勿部珣造像功德記

景龍元年十月 郭謙光撰并隸書今在太原縣

金石文字記口部將軍功德碑今在太原縣天龍寺將軍名珣其氏曰口部而部上闕一字官至天兵中軍副使右金吾衛將軍上柱國開國公與其夫人黑齒氏造像之記其文曰本支京海世食祿德相虞不臘之奇族行太上懷邦由余載格蓋蕃將之歸唐者也

潛研堂金石跋尾右口部將軍功德記唐時并州置天兵  
軍口部以右金吾衛將軍爲天兵中軍副使因造三世佛  
於太原之天龍寺碑文八分書而首行郭謙光文及耆六  
字則篆書金石文字記闕謙光之名今據石本補之珣妻  
黑齒氏燕國公常之之中女常之百濟西部人而此碑亦  
有本枝東海之語金石文字記作京海誤疑珣亦系出百濟與常之  
同降唐者爾碑末題景龍元年歲在鶡首鶡首於十二次  
屬未是年太歲在丁未也

平津讀碑記文云勿部珣本文東海云云珣之歸唐當在  
高宗時文苑英華蘇頌命姚崇等北伐制有右金吾衛大  
將軍珣郭謙光官國子監丞太學助教此記無結銜寶刻  
類編謙光所書六碑無此

彌陀像石龕記

貞元四年七月 今在聞喜縣東宋村

聞喜縣志右像龕高尺餘廣六寸在邑西五里東宋村  
就龕內鑿爲佛像龕之兩柱及臺上皆作小楷篆岩秀  
逸是得法於李北海者邑翟氏稱巨族而居是村者爲  
繁向見象陸方伯撰其族譜有李唐聲迹之語頗疑其  
無徵今觀此記果唐時居此象陸爲不妄矣龕雖小品  
有益考證翟氏其珍護之案龕文有云佛弟子康直本  
爲亡孫婦史氏孫恩湖西行  
敬造阿彌陀像一龕柱側題云直妻翟男  
懷慮下盜題云懷慮亡妻翟見存妻口

金

崇福寺造像題字

大定十三年 今在壽陽縣西可村

齊陽縣志殿後有石佛狀甚古其右股有字半殘闕可  
辨者惟金大定十三年本里趙缺立像至泰和七年寺  
僧妙湛獻進義校尉劉缺二十餘字

元

永利寺造像題名記

大德六年 今在介休縣王里村

介休新志寺宋建有元題名碑高四尺末畧大德六年  
歲次壬寅五月甲午朔十一日辛亥化緣都修造主海  
潤海瑞立石奉命書丹人前鄉貢進士王里村殿觀碑  
前後界作十層每層人名有都功德主都維那剃首維  
那助緣維那管理維那蓋猶沿六朝之稱謂也當時守  
土官則題曰從仕郎縣尹兼諸軍奧魯勸農事田澤又



山西通志卷九十一  
金石記  
王益

石碑嶺造像題名

今在鄉甯縣東南丹石碑嶺

鄉甯縣志古碑嶺縣東南四十五里有古碑字磨滅故名

謹案碑鐫佛像約百區旁列人名可辨者只邑子諸字當是唐以前古寺物也而寺基久圯志不能舉其名矣石色赤故俗呼爲丹石碑

右造像

絳帖

舊在絳州

集古錄石小字法帖者近時有尙書郎潘師旦者以官法

私自摹刻於家爲別本以行於世余因分以爲類散入  
集錄諸帙而程應衡夫人鍾繇王廙宋儋皆以小字爲一  
類於此余嘗辨鍾繇賀捷表爲非真而此帖字畫筆法皆  
不同傳摹不能不失本體以此真偽尤爲難辨也

舊通志一名潘駙馬帖宋姜夔釋帖平序云釋帖傳至  
今者三四本潘師旦所刻爲勝絳州公庫本次之嘉泰  
辛酉友人朱子以絳帖遺余余因爲之本事釋支明闕  
調鼎序云宋尙書郎潘師旦用澗化法帖增入別帖重  
摹刻二十卷爲絳帖北紙北墨極有精彩世傳潘氏子  
析居法帖石分爲二其後絳州公庫乃得其上十卷絳  
守重刻下十卷足之一部名東庫本其家復刻上十卷  
亦足一部於是絳州有公私二本靖康兵火石並不存

或曰州官惡石之爲厲也碎而瘞之後金人重摹爲十  
二卷歲久石本不完崇慶初高汝礪又補完之增入魯  
公諸帖以壯忠義之氣有明宣德間石入晉府不可復  
觀其初摹刻傳世者有亮字不全本又有新絳本北方  
別本武岡新舊本福清烏鎮彭州賁州本木本前十卷  
等類皆絳帖之別本昔人所謂有別本無贗本也

元王沂絳守李榮祖政績碑絳帖碑石多散失公求之  
復其十之八九序列於集古堂

明呂構記絳州守程君騰漢於州治左壁得韻禹孔籍  
四書乃未移晉府者

案此石今亦不存

真賢堂帖

今在太原府晉陽書院

舊通志寶賢堂石刻舊在晉府今移入三立齋晉世子  
奇源集古法帖序取消化諸帖並我朝以書名者數十  
家擇其尤者摹勒上石釐爲十二卷跋多熊跋石經亂  
不全順治間郡守宗得於斷壁頽垣者二十餘塊今訪  
求藏本舊搨鈎勒上石計補五十餘塊而全帖以完  
傅山寶賢堂帖跋古人法書至醇化大備其後來撫勒  
工拙固殊大率皆本之醇化進至有明則有肅藩之醇  
化仍其舊名卷次不少變更周藩之東書堂晉藩之寶  
賢堂則稍有顛倒增益今此三本並行入閩泮帖撫勒  
無丰采肅帖豐肥濃態側出晉帖圓秀道如出周肅上  
二王鈎勒尤爲精妙獨獻之授衣一帖不及肅帖遠甚  
然肅本此帖亦不及汝刻也故老或傳載取絳帖之石

而冒之以寶賢之名往問諸府中老尉言取庫中分蔭  
時所得絳帖鈎之上石且其自序亦言取庫中醜化及  
絳帖鈎之石經亂不全棧樞糞壤僅得七十餘塊其廿  
餘塊有得之東門人家水竇中者吾向稱此不全本爲  
寶本運至汝翁令君采烹鮮之暇流覽感慨於兵征催  
科鞅掌之間興及銀鈎鐵畫乃延晉水段生絳鈎補鐫  
勒五十三塊而頗欲還其舊觀迂人且以爲不急之務  
夫非風流蘊藉孰能若此者乎老來諸緣牽率一切皆  
斷惟水墨積習未除復此勝舉但有贊歎

古寶賢堂帖

今在太原府令德書院四徵君祠

謹案帖爲鐵嶺李清鑰守太原時取所藏唐儲登善

朱蘇東坡黃山谷朱子元趙子昂並蹟摹勒上石又  
蓋以近代人書凡四卷石置府署後非寶賢堂故址  
也以帖中有晉世子書仍襲其名而別之曰古不甚  
可解其編次以朱子書弁首將以此事爲因文見道  
乎又何所取於王覺斯也

又紫法帖皆出後人摹刻不能復以上石之年爲次  
列其總部於前散刻者附之集書又法帖之重儻也  
而其體式有類碑版則以撰文之時代爲斷

蘭亭序上黨本

舊在長治縣署

志略明醴泉苟好善令長治於署內瓦礫中得之筆法瘦  
勁有神差有定武風味蓋歐陽信本摹本也後有董文敏

公跋及好善等跋今在咸陽程杏牧家建寶蘭軒藏之石  
尙完好按武定名拓稀如星鳳類上本偶爲董文敏所賞  
一時並盛行乃不久卽爲令某所毀令人恨恨今存於世  
者有東陽何氏一白本然粗硬少姿識者弗取惟此刻道  
勁而有韵度爲定武的派今海內盛行然舊拓極難得也  
謹案明人跋聖教序潞府尙有黃庭經荷花札二帖  
與蘭亭俱一時刊行則是帖亦明代所摹刻也

陶淵明手書雜詠詩石刻

今在沁州張氏致遠堂

張孝程跋靖節先生人品學問晉代第一從未有稱及  
書法者歲辛酉余於友人處得所草雜詩十二首古勁  
流逸墨蹟宛然遂攜至京每一展玩輒不忍釋手因思

物之美者不可祕而弗傳與傳之不廣且久况物以人  
重世不經見如先生手澤耶爰訪名工鑄之貞石以公  
天下後世知好事者觀之不帝神依五柳覺羲皇上人  
衣冠去今不遺也

案是卷於忠聖歷中曾遺御有武后  
手書御覽及鳳閣小置其前有衣帛

沈約二跋後有秋仁傑崔元暉蘇翹張輔惠郭元振  
姚元之諸人奉勅題唐以後則僅王十朋一跋而已

李靖上西嶽王文

今在潞城縣

虞川書跋世傳扶餘國事類若劍俠而衛公從之似以任  
縱自喜然考其行事則動以禮法自約又若老書生此書  
豪武自將亦既放矣或疑其僞將以暴侮神差求合於杳  
冥者乎亦當時憤激感慨豪氣未除而然耶劉餗嘗言衛  
公訴神且告以官位所至詞氣抗厲後有聲曰僕射好去



後果如言此誓殆似或真有是耶將後入因此附益之手  
餘在開元中其說似有據若可信也

弁州山人續稿李衛公上西嶽書不見正史意者影響之  
談如虬髯客傳類耳其書亦似唐末五代人筆雖不見整  
栗而微有意衛公將略爲唐初第一功最大故好奇之士  
多傳之

石墨鏤華此好事者誣衛公而爲之書詞可笑而唐劉餗  
言之又小說載公射獵行兩事殆異人不可以常理論也  
書三種潞州者崇甯間刻滕縣者紹興間刻西岳廟則近  
刻筆亦遒逸王元美稱之當是潞州本滕縣者不及近刻  
又下矣

金石萃編衛公上西嶽書不書年月唐書本傳作公以貞

觀二十三年薨年七十九推其生在陳宣帝大建三年辛卯北朝爲齊武平二年周天和六年後梁天保十年其仕隋至大業末爲馬邑丞其初爲殿內直長大約在仁壽大業之間計其年三十左右矣此書自稱布衣作於未仕之時則在二十餘歲也年少氣盛志在功名其家在京兆三原地近西嶽爲書告神理亦宜之但其上書之時正文帝平陳之後亂象未形文中社稷凌遲宇宙傾覆奸雄競逐郡縣土崩之語又何所指亦非智勇深沈者所當出此故論者皆以爲妄人僞作殆不誣矣

聖教序集右軍書

今在太原府學

劉儲秀府學石刻聖教序跋字至於晉晉至於王王至

於行已極矣黃庭蘭亭楷也荷花札草也露已俱刊行  
矣行如聖教序獨可缺乎哉故今陽曲崔尹廷槐以詔  
原生術模諸貞珉而布諸學宮云或曰儒釋不同崔曰  
取其書不取其人況非是莫好卽此是學其卽程伯子  
主敬之意

慈林寺集右軍書

今在長子縣

謹案原石久亡乾隆中縣人馮士翹得殘搨百二十

三字重刻之

文有大參方九歲離上無碑符中事  
刻科語蓋宋人集以敘王昭事書

夫子廟記集右軍書

今在絳州

弇州山人稿絳州夫子廟宋人集右軍書聖教序猶是

蹟中集者此又從序書及他石摹刻形似之外風流都盡  
突然記得朱紫陽好書孟德書劉共父好魯公書朱以時  
代談之劉荅固耳吾唐忠臣若漢賊也朱乃屬笑此夫子  
廟記不當勝作裝師序耶吾姑爲此石解嘲

金石史夫子廟記集逸少書搨刻手俱精雅第中忽雜以  
一二草書杜撰不入格宋人儉父之態居然畢露矣

金石萃編按此碑泐其年號但存六月癸未朔二十八日  
庚戌重立据遼史朔考六月之爲癸未朔者在仁宗天聖  
十年又以宋史傳證之垂字舜工聊城人咸平中登進士  
第遷著作郎館閣校理累修起居注罷知亳州遷潁晉終  
三州明道中遷朝出知均州卒史不詳其知絳州在何年  
其爲明道以前已屬可据則此碑確爲天聖十年立也垂

之去絳亦正在是時碑何以云重立是所未詳也案碑立其年十一月改元明道是天聖十年即明道元年也謂垂去絳在碑立時固合特據碑文則修廟者爲前知州夏侯澆及同知州梁昭遠至咸平五年知州郭夔始成之由天聖十年王中上湖咸平五年王寅諭三十年矣文云非一命未行召試閣下於梁卿得崇朝現席之選卿同理於絳垂書掌法於解與夏侯公以夫子廟每指爲祀遠公歸年則文實成於五年垂方登第時必久已刻石其後二十四年垂別刻之故云重立也

鹽池新堰箴集右軍書

舊在安邑縣運城察院

投堂金石三跋碑半已磨損今崇其序鹽池之守設兵以防之樹棘以禁之置屯以斂之建官以統之與朱史食貨志參校所云巡邏之兵百人目爲護寶者合而新堰修葺則又以設防滋弊故易之而便利於民也今史獨執此事

何默序言卽日議定其狀馳驛以聞又云乃奮勸請遵下  
命而營成之當時改制之規奉命於上而又獲有成效不  
宜盡沒其實使才臣計畫不著於世也碑前題銜朝請郎  
守尙書祠部員外充集賢校理知解州軍州下騎都尉賜  
排魚袋借紫張名又有仲君字蓋其奏請營兩池新堰在  
天聖九年冬十月而碑記之立則在十年十月兩池者解  
縣安邑也集勒字人拓本過疊重不可辨是役也以箴詞  
內云總領曰恩曰鼎殆一時之人任事者故并著之亦以  
吾儕喜發人之名因事輒見如此

金石萃編按兩池築新堰宋史食貨志不詳山西通志鹽  
法門載畦池之制而亦不詳築堰之事要之池鹽澆曬全  
藉蓄水則築堰爲蓄水之良法此碑可補河東鹽法紀載

所未備此碑與前碑重修夫子廟記皆集右軍書而此摹勒較勝惟所題後郊跌跌集勒者殊不可曉

運城志王右軍碑刻於宋天聖十年壬申十月癸卯世

代遐邇破碎剝蝕明萬厯間王公重鑿斷碑殘書爲世

所寶御史徐越記云碑中字磨滅者不可識其未磨滅者

記今按此碑乃宋人解州鹽池新堰麓并序兩字則集

晉右將軍王羲之書非右軍筆也然宋時僅此一碑於棗院婆娑可

愛護志於此

謹案二碑一年所刻集書之人絳州碑署曰逸民

跌望集刻鹽池碑署曰後郊跌跌錄集勒一泐其姓

一失其名互校當是一人爲跌跌望也後郊或地名

或卽其字跌跌復姓元和姓纂開元中有左威衛大將軍赤水軍副使武威公跌跌舒唐書地理志呼延

都督府有跋黔州蓋蕃將之歸唐者以地爲氏也  
或其後裔歟

司馬溫公布衾銘石刻

今在夏縣溫公祠

謹案銘爲溫公手書元祐戊辰姪富模刻范祖禹有  
序略云文正公所服之布衾隸書百有十字曰景仁  
惠者端明殿學士范公之所贈也曰堯夫銘者右僕  
射高平公所作也元豐中公在洛陽公自許往訪之  
贈以是衾先是高平公作布衾銘公愛其文義取而  
書於衾之首及寢疾東府命斂以深衣而覆以是衾  
云云

東坡居士赤壁賦



今在潞安府經歷署

長治縣志是賦書法道媚刻手亦佳惟後有元豐三年  
王戍字壬戌乃元豐五年也坡公何至誤書疑明人偽  
爲好事者取刊於此也

黃山谷薄酒醜婦二歌石刻

行書今在襄垣縣

黃華老人詩刻

草書今在汾州府學

汾州府志黃華亭在汾州儒學泮池西儲金翰林修撰  
王庭筠行書詩石庭筠父遵古爲汾州觀察判官省親  
至此州學改爲汾陽縣學舊石漫滅不存今府學及縣  
學各有石四皆重摹刻者矣亭亦久廢金史稱庭筠讀

晉黃華山寺因以自號書法引米元章與趙風趙秉文俱以名家

謹案朔平府志黃華老人石刻在府城內白衣寺未知亦卽此四詩否王述菴金石萃編云河南通志載黃華老人金翰林王庭筠四絕句原在黃華山嘉靖間僉事崔官搆帖至榆李元陽重葺之今碑在大理雙塔寺所載詩正與此四詩大同蓋王氏著錄者卽雲南本滇行記略謂以橫柳殼蘸墨書相傳爲仙筆者則邊土傳聞之誤也

趙開閱陰符經

今在平遙縣清虛觀

平遙縣志金趙秉文草書陰符經古今重之碑高字大

硬峭新拔骨力殊勝而石多斑剝神氣難存

右法帖

后土祠古塼文

篆書舊在榮河縣

蒲州府志唐開元十一年祠后土於汾陰雕上有司修祠掘地得古銅鼎二又獲古塼十長九寸有篆書千秋萬歲字

禹故城古塼文

篆書舊在夏縣

王翰禹塼辨夏治西去十五里有禹故城城民掘地得塼方尺餘而中畫爲十二方方容一寸以篆書之其文曰海內勛臣歲豐登穀路無饑人雖累千百不異或傳

爲禹所陶人爭寶之塼散在四野非一處得竊疑故城  
與司馬公墓近當葬公之時必陶於近處用之餘者既  
無所措則必瘞之詳於文義字畫頗爲近似

萬歲富貴瓦

篆書舊在河曲縣

舊通志娘娘灘縣北九十里案距今縣  
治二十里居民耕鋤得古  
瓦有萬歲富貴字樣可爲硯

宋元祐塼文

舊在隰州紫金山

隰州志龍泉院在州東七十里舊名普照寺唐時建久  
圯明宏治中釋悟昇於故基掘得古塼百餘上有宋元  
祐年重修龍泉寺記乃與冥徒募修

右塼瓦

山西通志卷九十七